

Noć knjigi

Dan hrvacke knjigi

Dolores Paro-Mikeli

Gradska knjižnica Bakar
dolores.paro-mikeli@gkbakar.hr

Va bakarskoj je knjižnici bil vesel i lud i neće se baš tako brzo pozabit. Se j' hodilo kako j' rabilo... po domaću... stih po stih, anegdota za anegdota, svirka i kanconi, gluma... sega j' bilo, aš je naš moderator tako otel i tako storil.

Pu nas je ta dan rabila bit gošća, hrvatska književnica Ivana Bodrožić, al' kako j' iznenada bila sprečena gost na je bil gospon **Damir Sirnik**, više puta dobitnik Gervaisove nagradi za književnost po domaću. On je pak imel svoji gosti, jednoga pjesnika, jednoga glumca, jednoga i pjesnika i glazbenik, a onput je i Nikica Petković, naš moderator, imel svoga gosta, bakrana ki nan je povedal štorije keh se domišlja z pasanoga vrimena.

Nismo poslihali leh Sirnikovu poeziju, aš nas je Nikica domislel i na noničeve pjesmi, semin nan predragoga Nikolu Luzera i na Anta Martinića i na neke svoje... z rane, mladalačke dobi života, bobić slobodneje i bobić prosteje.

Ni se pozabil ni Shakespeare komu j' ova Noć knjigi bila posvećena i kako su va samoj najave objavili z Nacionalne i sveučilišne knjižnice va Zagrebu... *U Noći knjige 2016. William Shakespeare prošetat će hrvatskim*



knjižnicama, knjižarama, školama, muzejima i brojnim drugim mjestima, potvrđujući svoju nazočnost u našem kulturnom prostoru i vrijednost u kontekstu knjige i književnosti.

Pu nas je, samo da znate, isto bil Shakespeare i “prošećal” se doslovno, al' vamin ki niste bili nećemo povedat kako j to bilo. Danaska bi mladi rekli “spektakularno” i takova j' bila cela i duga noć knjige va našoj knjižnice... od pasane sedme uri večer do pasene desete, aš se nikomu ni dalo doma poć, a bilo je i praveh pohval z publiku... *najbolje do sad!!!... bilo bi mi žal da nisan došal, al' da nisan došal ne bin ni znal ča san propustil... al' nisan propustil, aš san bil!!!*



Saka čast našem Nikice, na večeri ku nan je zajedno z gostemin pri-
pravil... punu smeha, zafrkancije, recitiranja, glumi, svirki, ludiranja... baš
kako se Shakespeareu i pristoji i sigurna san da je i On negdere gore vesel i
kuntinat kako smo ga se mi va Bakru domisleli.

